



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Democrats temi US Senate amokbangtsü akok

TAPAK 3

CM Zoramthanga-i bailey bridge tasen ka lapoktsü

VOL. XVIII NO. 83 (ADOK 83) DIMAPUR

YANGTEPNÜ (THURSDAY) AENJETI (JANUARY) 07, 2021

₹ 5.00

Nagaland nung Feb 2021 nungi school tem lapoktsü

Dimapur, January 6 (TYO): Nagaland sorkari February 2021 nungi class VI ser tema kaketshirtem atema school lapoktsü telemetba agiogo.

Taoba Hokolbarnü Nagaland chief minister Neiphiu Rio menden ser senden ka amendang iba telemetba agi.

Nagaland Department of School Education-i shilem lemsar school nung class tem tenzüksü atema sentong renemtsü. DoSE-isa health department den külemi novel coronavirus memenatsü atema standard operating procedures (SOPs) latettsü.

Nagaland sorkarisa Nagaland University (NU) dang January 18 nungi semester examinations agitsü atema tetuyuba agütsüogo. Tatidangji online agi tajungba ta sorkarisa ashi.

NU-i February 2021 tanabuba hopta nungi class tenzüksü sentong lir.

Nagaland nung technical institutions atema academic session tasenji sangküm February 25 nungi tenzüksü akok.

Sorkari technical institutions dang COVID-19 inyakyim benshia offline aser online class tem agitsü metetdaksüogo.

Yaküm September ita Nagaland

state sorkari 'voluntary basis' nung school tem lapoktsü telemetba agi. Iba temelaba ya skill & entrepreneurship training institutions nema agütsü.

ANCSU-i STATE SORKARASER NU DANG PELAR: State sorkar aser Nagaland University (NU)-i Online yimya nung Undergraduate odd semester examination agitsü lemtetba atema tenüngsang agütsür All Nagaland College Students' Union (ANCSU)-i metetdaksüogo.

"COVID-19 wara ajanga tatidang Online yimya nung agitsü ta Nagaland University-i tanü metetdaksüogo. NU aser State sorkari iba telemetba agiba ajanga kaketshirtem aser college tem atema süoki ia bilemstüba sayur. College kaketshir ajaki tebilemstü bena online exams agütsütsü aser takok angutsü mepishir" ta ANCSU-i sangdong ka nung ashi.

January 18 nungi February 4, 2021 tashi undergraduate odd semester examination agitsü sentong lir anungji tatidang agütsüba mapang bangdakpurtem aser service providers-i power supply den internet services shitak agütsütsü mepishir, ta Tir Vimieykho Vitso aser Tongti Tezülur Imnameren N Jamir nati sangdong nung metetdaksüogo.

Congress-i Nagaland yimten tebilemstü atema inyaka arur

Dimapur, January 6 (TYO): Congress-i timi Nagaland yimten tebilemstü angatetteptsü atema inyaka arur aser Niki Sumi-i anir NSCN(K)-i yimjung maparen nung adentsü lemtetba pelashishia agizüker, ta NPCC Tir K Therie-i ashi.

Nagaland State kümtetba sülen nungi Nehru-i yimjung olemtep alitsü jaok. Indira Gandhi-i FGN Delegates den indangindanga trokben tashi olemtep aser Rajiv Gandhi-i May 19, 1991 nü tatemzükba kecha melii olemteptsü jaok. P.V. Narasimha Rao-ia February 22, 1996 nü Dimapur nung tatemzükba kecha melii olemteptsü jaoka liasü. Iba sülen July 1997 nungi NSCN (IM) den olemtep tenzüker aser taoba Chief Minister Dr. S C Jamir alidang July 25, 1997 nü Ceasefire aliba osang sangoktsü. Item tesüiba putiotsütem yagi asangdang nung temelenshi bentsür arutsüogo, ta K Therie-i sangdong ka nung ashi.

Ajisüaka, Ceasefire Ground Rules sülen timi manidakba ajanga ozüing alema sen saruba ajanga nisung tepsetba, pur aoba, bank auyaba, tashiyim agi tetsür dak shi nung medemba aser amokmerenba inyakyimtem adok. Item inyakyim indang khuretemji public-i abener aser tanü sorkari ozüing alema inyakba mapa nung yariteper. Anungji public-i pei sasa ketdangsüba takhangba atema ola madoker saka timi yimten latettsü atema ang ola adoker. Nisungtemi Indian security forces dang nungi kümzükba aser Naga National Workers tsübuba tia ka ajurua lir, "August 2015 nung Framework Agreement agiba ajanga yimten latettsü atema len sayu. Külen,

NNPGs aser India sorkar tsüngda November 2017 nü onüktem mulung agizüktepba atema onok palar. Nagaland yimten latettsü atema mapang tonga arur aser ni September 25, 2020 nü AICC High Powered Committee dang osang lemsatepogo aser parnoki pusema nungittsü mulunga agizükogo" ta NPCC tirisa ashi.

Tang iba onük ya Manipur nung anendaka lir aser Manipur Naga nungertemi Nagaland nung dang ochishia ashitsüla. 16 Point Agreement aser Nagaland State anguba sülen R.C. Chiten Jamir-i Ukhrlul nung public senden nung aden aser idangji Nagaland State tasenba nung adentsü asü madentsü ta asüba jembi. Iba senden nung Manipur Naga nungeri Nagaland state tasenba nung adentsü magizük. Tanabuba nung Manipur nungi Naga lennirtemi Chief Minister inyakdang, Manipur ali nungi inch ka danga magütsütsü ta sangoktsü. Onoki iba ya yanglushitsü ta bilem saka Framework Agreement nunga Naga nunger aliba tesemtem lokteptsüba onük mebenok, ta K Therie-isa metetdaksü.

"Manipur Naga nungertem sasep nung obang meputep alibatam angatetteptsüla. India sorkari putiotsü aser inyakyim meteta lir aser special provisions ajanga kin, sobaliba aser lokti inyakyimtem kümzükba ayutsüla. Ajisüaka, Manipur khuret ajanga Nagaland atema telemetba agiba nung tetsükdaksü magütsütsüla. Taremzükba maliba mesüra pei lima atema mebilemba ajanga masü saka telemsa aser tashiyim agi sen saruba ajanga Northeast tashimait küm daksüogo" ta paisa ashi.

Anogo 9 buba Dzukou morok mi anema raraogo; Tanü nungi mapa tuluba inyaksü



Bodbar nikongdang Home Commissioner Nagaland, Abhijit Sinha IAS menden ser Dzükou Fire Operation atema senden amenba noksa nung angur. (DIPR)

Kohima, January 6 (TYO): Tanü agi anogo tukububa Dzukou tükong nung morok mi adokba remseptsü merangogo.

Indian Air Force (IAF)-i tayimtsü air ajanga aser NDRF, SDRF, Home Guards & Civil Defence, Police aser Southern Angami youth Organisation (SAYO) volunteers-i ali nung morok mi remseptsü atema inyakaka, tanü tashi ano ajunga meremsepteti lir.

"Tesem balala nung mi prokshia lir. Brihostibar anepong nungi mapa tenzüksü atema base camp nung police, Forest, NDRF, SDRF aser SAYO volunteers 130 dak tema anenzüka lir," ta Divisional Forest Officer Kohima Rajkumar M-i ashi.

"Parnoki asüngnep yakta mapa tenzüksü atema mi adoka aliba tesem anasa anenzüka lir. Asüngnep ano nisung 90 shi ka parnok den yaritepi aotsü aser nisung 250 shi

kati mapa tuluba inyaksü imlar" ta Rajkumar-isa metetdaksü.

Bodbarnü IAF helicopter tem ajanga Dzukou heliport-i fire fighting equipment, ration, & camping materials bener ogo, ta paisa shisem.

Tang tashi nungbo Dzukou valley kümzükba lir, ta DFO-isa ashi.

"IAF helicopter temi Dzukou nung morok mi anema mapa inyaksü aser tanü firefighting equipment seret 3,310 den NDRF personnel anir ogo," ta PRO (Defence) Kohima Lt Col Sumit K Sharma-ia metetdaksü.

"Tanü Kohima anasa Jakhama nungi IAF helicopter temi osettsüet belenba den nisungtem anir ao. Brihostibar nunga IAF-i maneni mi anema raraba nung yariteptsü" ta Lt Col Sumit-isa ashi.

Bodbar nikongdang Home Commissioner Nagaland, Abhijit Sinha IAS menden ser Dzükou Fire

Operation atema senden ka menogo.

Iba senden ya in DC Office, Kohima nung amen aser Commissioner Nagaland, Rovilatuo Mor IAS aden.

Senden nung Kohima Deputy Commissioner, Mohammed Ali Shihab A-i Dzükou nung mapa inyakba osang lemsatep.

India Air Force (IAF) Pilot temi ashiba agi morok miji Dzükou Valley anüdoklentip tsütsü ronga arudar ta shiogo, ta DC Mohammed-isa ashi.

Senden nung asüng nung mapa tuluba inyaksü aser India Air Force (IAF)-ia tzü timba belentsü jembitep.

Senden nung SP Kohima, Manoj Kumar; DFO Kohima, Raj Kumar; ADC Kohima, Lithrongla Tongpi Rutsa; Deputy Commandant NDRF aser tangartem aden.

COVID-19 Nagaland: Nisung 17 dak putet; 11,603 kümogo

Kohima, January 6 (TYO): Bodbarnü Nagaland nung nisung 17 dak COVID-19 aliba putetogo aser parnok züngsem nisung ajak agi 11,954 kümogo.

December 29, 2020 nungi tenzüker yashi tashi Nagaland nung nisung 10 teküpok dak dang COVID-19 puteta aruogo.

"Tanü nisung 17 dak COVID-19 aliba putet. Parnokji Dimapur nung 15 aser Kohima o Longleng nung kaka (1) lir. Külen, nisung 22 taneptsü angu. Parnokji Dimapur nung 19 aser Kohima nung 3 lir" ta Health & Family Welfare Minister, S Pangnyu Phom-i ashi.

Nisung 11,954 rongnungi 11,603 taneptsü nguogo aser tang parnok 137 anepaludar, ta paisa ashi.

Tang Nagaland nung taneptsü angubaji 97.06% lir aser anepalurtemji COVID-19 aliba putetertem rongnung 1.15% dang

lir, ta Minister Pangnyu-i ashi.

"Mokokchung nung COVID-19 aliba puteta alir ka asüba züngsema tasür ajak agi nisung 80 kümogo. Tasürtem rongnung parnok 70 coronavirus ajanga aser nisung 10 tanga timtem ajanga asü," ta Health & Family Welfare Department Director, Dr Denis Hangsing-i ashi.

Nisung 134 tashi tanga state temi ogo, ta paisa shisem.

District balala nung COVID-19 putetba: Dimapur (6,420), Kohima (3,716), Mon (604), Peren (503), Tuensang (244), Mokokchung (179), Zunheboto (142), Phek (47), Kiphire (41), Wokha (39) aser Longleng (19).

Nisung 11,954 rongnung Traced Contacts 4,888, armed forces personnel 4,657, tanga state tem nungi arur 1,842 aser Frontline Workers 567 lir, ta Dr Hangsing-isa ashi.

District balala nung tang

anepalurtem: Dimapur (68), Kohima (48), Mokokchung (13), Peren (5), Mon (1), Longleng (1) aser Kiphire (1).

"Tang anepalurtem rongnung nisung 18 dak shirangba yimya terara lir, ka kanga shiranga oxygen agidar aser 3 ventilators nung yua lir. Nisung 115 dakbo shirangba yimya kecha mali," ta Dr Hangsing-isa ashi.

Taneptsü angurtem: Dimapur (6,228), Kohima (3,616), Mon (592), Peren (498), Tuensang (243), Zunheboto (139), Mokokchung (157), Phek (47), Kiphire (39), Wokha (35) aser Longleng (9).

"Nagaland nung COVID-19 alitsü akok ta temulung melemi bilemba sample 1,21,268 tendangogo. RT-PCR ajanga sample 72,571, TrueNat ajanga sample 36,795 aser Rapid Antigen Test ajanga sample 11,902 tendang" ta Dr Hangsing-isa ashi.

Feb 25 nü India nung nashi indang tatidang agitsü

Guwahati, January 6 (Agencies): Centre sorkari February 25 nü national-level nung 'Gau Vigyan' (examination on Cow Science) agitsü osang metetdaksüogo.

Iba osang ya Rashtriya Kamdhenu Aayog (RKA) ajanga metetdaksü. RKA ya nashi yaritsü atema sorkari tentetba telok ka lir.

Iba tatidang ya national level nung online yimya ajanga agitsü aser multiple choice questions 100 alitsü.

Iba tatidang dang 'Kamdhenu Gau Vigyan Prachar Prasar Examination' ta ajar aser fee kecha magitsü aser ghonda 1 agitsü.

Iba tatidang ya kümshia agitsü ta RKA Chairman Vallabhbai

Kathiria-i ashi.

"Onoki February 25 nungi 'Kamdhenu Gau Vigyan Prachar Prasar Examination' agitsü. Nashi dak science sünga lir aser itemji bushitsü nüngdaker" ta Kathiria-isa metetdaksü.

Iba tatidang ya English aser Hindi den regional languages 12 nung agitsü.

Akumli Tongpang kaket sayaogo



Er. C. Kazükaba Jamir-i züluba pei taküm zülü 'Akümüli Tongpang' kaket LBA Pastor K. Supong (achichi) ajanga sayatsüadang tangokba noksa nung angur.

Dimapur, Aenjeti/January 06 (TYO): Dimapur nung alir Longsa nung Er. C. Kazükaba Jamir-i Ao oshi nung züluba kaket "Akümüli Tongpang - Pei Taküm Otsü Zülü Ka" January 6, 2021 nü Longsa yimdak Longsa Baptist Arogo Pastor, K. Supongi meshiteta sarasademer sayatsüogo.

Iba kaket nung kaket züluri pa tensa tamajung ka nung asoba, pa tila asüadang sepia dang nungi jenshia tsürabur den alu nung aliba, Ungma yimdak grouping nung aliba, pa tetsüi pa yakta toktsür aoba,

kinungertemi arem sepia nung idaktsütsü merangba, Mokokchung-i kili-i aoba, hajira oa high school azüngba, college azüngdang T.B hospital nung amungba, sorkar mapai yir küm 26 buba nung khien promotion anguba aser ano temenungratsü otsü tajung aika keta lir.

Pa taküm nung dangar dang alia ajangshiba aser timtem toushi jenti ajuruba agi iba kaket ya "Akümüli Tongpang," ta jatsü.

Er. C. Kazükaba Jamir ya aluyimer kibong nungi timtema zünger engineer jenjang tongtetba taküm ka lir. Pa Atoizü nung küm

3 Diploma in civil engineering azüng aser sorkar mapa nung küm talangka tenzüka arur July 31, 2015 nü Asst. Engineer nung sodi angu. Pa ya ajemaluba, ochishir aser sobaliba otsü olem aser lipoklisang metetba nübu ka ta züngshir.

'Akümüli Tongpang' kaket ya Dimapur nung Christian Literature Centre Opposite Dimapur Market (Nyamo Lotha Road), Kohima nung Bina Book House Opposite State Library (P.R Hill) aser Mokokchung nung Eastern Book Depot, MTBA Basement (Main police point), item dokantem nung senpak 200/- agi talitsü angutsü.

Pai tamalena Sobaliba Penzü (2010), Kisüjensü angazütsü tuyuba (2014), Sobaliba Mongchen (2015) aser Asaya menü Otsü (2019) kaket tem zülua lir. Pai tang züluba "Akümüli Tongpang" ya züngabo kaket ajak agi pungububa asütsü. Dangar den sentepa züluba kaketema karbo lir. Ao Senden Literature Board (ASLB) ajanga B.A level nung azüngtsü adokba textbook 'Shisa Jen' kaket nunga pai shilem agia lir. Kari danga iba kaket dak sentakba nung osang tejangja aginüra mobile number 9436804549 ajanga kaket zülur tongtettsü akok.

Dzükou morok mi remseptsü atema mapa lemsatsür

Dimapur, Aenjeti/January 06 (TYO): Dzükou nung morok mi adoka aliba remsepba maparen nung Sub-Divisional Officer (Civil), Jakhama den yariteptsü atema Deputy Commissioner, Kohima, Mohammed Ali Shihab A ajanga tsünglanglen tenüng agüja aliba ketdangsürtem shimtetogo. Parnok ya telok balalai morok mi remsepba nung shilem agirtem den osang ola agiteptsü atema Base

camp, Dzükou valley nungalitsüla, ta sangdong ka ajanga ashi.

- 07/01/2021 Shri. Shaying Sheu, SDO (C) Sadar 8974560016
- 08/01/2021 Shri. Shaying Sheu, SDO (C) Sadar-do-
- 09/01/2021 Shri. R Daniel Angami, SDO (C) Estt. 9436273942
- 10/01/2021 Shri. R Daniel Angami, SDO (C) Estt.

-do-

- 11/01/2021 S h r i . Tiayanger Jamir, SDO (C) Sechü Zubza 9862853509
- 12/01/2021 S h r i . Tiayanger Jamir, SDO (C) Sechü Zubza -do- Medical emergency atema parnok meina Dr. Rüyangulie Paphino, MO alitsü, ta sangdong ajangasa metetdaksü.

Kisan Morcha, BJP Mokokchung ajanga aluyimer sentong katsü



BJP Mokokchung district ketdangsürtem den aluyimertem Longjang lushi nung 'Farmer's Day out programme' agiba mapang tangokba noksa nung angur.

Dimapur, Aenjeti/January 06 (TYO): Küm tepiyong terenlok mapa inyaksangshi tenzüka, Bharatiya Janata Party ajanga Amisuba valley, Longjang nung January 6, 2021 nü 'Farmer's Day out programme' ka ayongzüka liasü.

Mening ayongkum nung aliba Amisuba lipa ya district nung ali temo timtiba aliba tesem ka ta züingshia arur, kong aluyimer temi tsünütsü balala yokba ajanga jangratema aazüka chiyonga alir.

BJP Mokokchung, Kisan Morcha yagi Agriculture & Water

Resources department ama sorkar indang agency balala nungi ketdangsürtem den lungjemer iba sentong ya ayongzüik.

Iba sentong nung BJP Mokokchung district president, Imolemba Jamir ajanga Naga nung rongsenketsüng atema aluyimba kota tongtipang, ta asüba onük nung jembia liasü.

Agriculturalist ka asünung, Imolemba Jamir-i nüburtem dang yimtsüng alema oa mangdang yur aonsotsü züsentsü ajungshi, aji asünung dang aluyimer temi züsentetba chiyongsütem tesem

balala nung belenshia yoktettsü, ta ashi.

Kasa sentong nung BJP Vice President, Nukshi I. Ozukum-ia aluyimer ajungshia liasü. Lokti nung aluyimer ya tongtipang nokdang ka lir, anungji local market tem kisüng nung dang merangloksüla, ta pai ashi.

Water Resources Department nungi SDO, Putikokba, shiba iba sentong nung shisalen sayur ka liasü, pai lipak nung tzi wazüka ayutsü indang jembia liasü. Sorkari akok tashi aluyimer yaritsü, ta paisa ashi.

Rangapahar Military Station nung Army recruitment rally alitsü

Dimapur, Aenjeti/January 06 (TYO): Bhagat Stadium, Rangapahar Military Stadium, Dimapur nung Nagaland nungi lanurtem atema Army Recruitment Rally ka March 10, 2021 nungi March 20, 2021 tashi alitsü, ta sangdong ka ajanga ashi.

Iba atema online application ya January 9, 2021 nungi February 22, 2021 tashinung agütsütsü akok. Online registration atema www.joinindianarmy.nic.in nung login sür agitettsü. Taoba mapang register sür aliba candidate temi indang indanga login sür tasen ama apply asütsüla. Candidate temi register süa online application inyakyim tembangba sülen ang recruitment rally nung adentsü melatsü.

Mapa telemsa yamai alitsü: Soldier General Duty (10th & 12th standard), Soldier

Technical (12th standard with Physics, Chemistry, Maths & English), Soldier Clerk (12th standard in any stream with English and Maths/Accounts/Book Keeping), Soldier Nursing Assistant (12th standard in Science with Physics, Chemistry, Biology & English or 12th standard in Science with Physics, Chemistry, Botany, Zoology & English), Soldier Tradesmen (8th & 10th standard simple pass).

CEE ya Rangapahar Military Station nung April 25, 2021 nü agitsü. Iba dak sendakba nung osangtsüsang tali metettsü atema phone number 03862-249012 mesüra 8974958673 nung mapa inyakba anogo mashi nung anepdang 8:30 ako nungi nikongdang 2:00 ako tashinung tongteprateptsü akok. Registration atema February 22, 2021 ya anogo tatem asütsü.

Naga rapper Macnivil indang music video tasen ka sayaogo



Dimapur, Aenjeti/January 06 (TYO): Kohima nungi rapper Macnivil, shiba state nung kentener nungtugu ka lir, pai My Cloud fairy (Remix) nungja agütsür music video tasen ka sayaogo.

Shidakba nung iba ken ya Dieze Sothu-i aten aser Mao

movie, Apfo nung OST ka liasü. Macnivil-i iba ken ya rap aser lo-fi element meyoktepa yanglushitsü merangba mapang iba ken remix yanglutsü atongtet. Iba music video ya YouTube nung <https://bit.ly/3nkcSQj> nungi nüburtemi reprangtsü akok.

CM Y Patton-i asükhu lemsatep

Dimapur, Aenjeti/January 06 (TYO): Deputy Commissioner, Wokha, Orenthung Lotha tetsür Limoni asüba osang angashia temolung shiranger aser jashia bilemer, ta Dy. Chief Minister Y. Patton ajanga sangdong ka nung lemsatep. Limoni ya Wokha District kübok Renthan yimtsüng nung December 5, 2021 nü asü.

La asüba ya kibong atema kisüng akoksaba masü saka

Tsüngrem tsüpuba tetsü aser nisung tajung ka asüba alitsü, aser la asüba ajanga tawa adokba menembangtettsü, ta ashi.

Tang mangyim jashi mapang ni aser ozü kibongi mangymer kibong den asükhu lemsateper aser Tsüngremi mangyimer nem tashi agüjang ta sarasademtsür. Asür tanüla teti tatem maka tesunep nung anisüngzünjang ta sarasademtsür, ta sangdong ajangasa ashi.

Mishilim village council ajanga shikariba & anga apuba nokdanger

Dimapur, Aenjeti/January 06 (TYO): Mishilimi yimtsüng nung Khristan yimsü amenoker December 21, 2021 nü küm 100 ajungba benjong amungstü alinung, iba benjongmung nungtem nung Mishilimi yim lushi nung January 1, 2021 nungi December 30, 2021 tashi shikariba aser anga apuba

nokdangtsü yimteni lemtetogo, ta Mishilimi Village Council ajanga Mishilimi yimtsüng nung aliba nübur aser anasa aliba yimtsüngtem dang metetdaksüogo.

Anungji iba pangzüng nung aibelener kar danga lira ozüng agi melaba ama merenshitsü, ta sangdong ajangasa ashi.

CM Zoramthanga-i bailey bridge tasen ka lapoktsü



Mizoram Chief Minister Zoramthanga-i January 5, 2021 nü Assam-Mizoram arrtsü nung Kawnpui River temdanga yangluba bailey bridge lapoktsüdang agiba angur.

Aizawl, January 6
(Agencies): Mizoram Chief Minister Zoramthanga-i Mongulbarnü Assam-Mizoram arrtsü nung bailey bridge tasen ka lapoktsüogo.

Iba apu ya Bairabi nung Kawnpui River temdanga yanglua lir aser iba ajanga tang nungdakbatem belentetsü.

"Mizoram nungeri tang nungdakbatem bener arutsü atema iba ya kanga dang

tongtipang apu ka lir" ta Zoramthanga-i apu lapoktsüdang ashi. Iba apu ya Rs 365 lakh endoka yanglu.

"Tang aliba apu nung khu taret abenba garitem mesenzütetba ajanga iba apu tasen yanglu" ta CM Zoramthanga-i ashi.

Kharagpur nung amenoka aliba Essen Infrastructure Private Limited-i iba apu tasen

ya Rs. 365 lakh endoka yanglu. Bailey bridge ya National Highway-154 nung lir.

Iba apu lapokdang Mizoram Chief Minister Zoramthanga den State Food, Civil Supplies and Consumer Affairs minister K Lalrinliana, Food Civil Supplies and Consumer Affairs secretary Vanlalngaihaka aser PWD chief engineer Lalmuankima Henry nungertem liasü.

Tripura BJP in-charge Vinod Sonkar-i state semdang



Vinod Kumar Sonkar (File photo)

Agartala, January 6
(Agencies): Bodbarñü Tripura BJP in-charge Vinod Kumar Sonkar-i anogo asemnü atema Agartala semdangi aruogo.

Tanü Agartala Airport nung State BJP lennirtem Tinku Roy aser Papiya Datta nati Sonkar pelaa agizük.

Sonkar-i Agartala nung state BJP lennirtem den senden ka amentsü aser Udaipur-i aotsü ta osang ka ajanga ashi.

Udaipur nung pai Gomati district nung party lennirtem den ajuruteptsü aser Brihostibarnü

Shantirbazar-i aotsü. Hokolbarñep pai Agartala-i meyipa arutsü aser tayimtsü ajanga Delhi-i aotsü.

Mongulbarnü chief minister Biplab Kumar Deb New Delhi-i ogo. BJP national leaders-i pa jaokba sülen Delhi-i ao.

Tripura nung BJP nungi temulung masüba MLA tem-Ramprasad Pal aser Sudip Roy Barman na tang New Delhi nung lir aser tenati BJP national president JP Nadda dena tongtipang lennirtem den ajuruteptogo.

Temulung masüba BJP MLA temi state lenisüba nung temelenshi ka asütsü takhangba agütsür.

Osang angazükba agi January 10 tashi chief minister indang sentong ajak thiogo.

CM Deb-i district asem semdangtsü aser Brihostibarnü Agartala nung Police Week nung adentsüba sentong renema liasü.

Deb-i Gandhinagar, Gujarat nung 'Rashtriya Samanaya Baithak' nung adentsü. Iba ya Rashtriya Swayamsevak Sangh (RSS) indang national coordination meeting ka lir ta osang ka ajanga ashi.

Gandhinagar nung senden amendang Deb-i BJP lennir tongtitem den Tripura nung yimtenren tensa indang osang lemsateptsü.

Yaküm December ita Sonkar-i Tripura semdangdang temulung masüba MLA temi "Biplab hatao BJP bachao" ta yimyim ayimtena liasü. Parnoki Deb ya Chief Minister menden nungi agiendaktsünür.

Arunachal nung nisung 2 pur aoba tsüngsü menguteter

Itanagar, January 6
(Agencies): Quippo Oil & Gas Infrastructure Limited nung mapa inyaker 2 pur orr tanü agi anogo 17 süiogo saka Arunachal Pradesh Police-i tena mebushitet lir.

State police-i iba ken o bushisüngdang saka totzü company ana nung mapa inyaker na ya kong lir'ar kuli kecha menguteter.

"Onoki iba ken o atema kuli tejangja kecha mangulir" ta Changlang SP Mihin Gambo-i ashi.

Quippo Oil & Gas Infrastructure Limited nung Drilling superintendent PK Gogoi (51) aser Radio Operator Ram Kumar (35) na December

21 nü pur ao. PK Gogoi ya Assam nungi aser Ram Kumar ya Bihar nungi lir.

Tena ya Changlang district kübok Innao nung Quippo Oil and Gas Infrastructure Limited drilling site nung mapa inyaker tem lir.

Iba ya atalokba sülen Quippo Oil and Gas Infrastructure Limited nung mapa inyaker Innao toktsür ogo.

"December 21 nü iba ya atalokba sülen Innao nung drilling site nung mapa inyaker temi tetsüba nung pei pei kidangi aser kar Duliajan nung office-i ogo" ta Changlang district nung Deputy Commissioner Dr Devansh Yadav-i ashi.

Mizoram State BJP tiri senotsü tim mesüi amshiba aitsür



Mizoram State BJP President Vanlalhuaka (File photo)

Aizawl, January 6
(Agencies): Mizoram State BJP President Vanlalhuaka-i party senotsü tim mesüi amshiba atema tai tongloksüogo.

"State President Vanlalhuaka-i sen lakh aika tim mesüi amshiogo" ta Mizoram BJP lennir aser social media convener K Vanlalruati-i ashi.

State BJP President inyaktüsü shimba sülen Vanlalhuaka-i Sunni Lalthangmawii ta ser non-Mizo tetsür ka Mizoram BJP secretary inyaktüsü shim, ta Vanlalruati-i ashi.

Vanlalhuaka aser Sunni Lalthangmawii na tesentaktep ka lir aser iba jagi la Mizoram BJP secretary inyaktüsü shim, ta Vanlalruati-isa tai tongloksü.

New Delhi nungi BJP national headquarters ajanga senotsü yokba Vanlalhuaka aser Lalthangmawii nati tim mesüi amshi, ta Vanlalruati-isa aitsü.

Tenati senotsü tim mesüi amshiba ajanga Mizoram nung party maparen nung tetsükdaktsü ajuruogo. Tiri sen mashii amshiba ajanga district temi sen aika yoktsü aliba meyoktetsüsa aküm, ta laisa ashi.

Lalthangmawii-i senotsü tim mesüi amshiba atema ashishitepba atema Vanlalhuaka-i tangar party lennirtem dang meshii la party nungi anentsü ta Vanlalruati-isa metetdaktsü.

Manipur nung Covid-19 ajanga nisung 2 asü

Imphal, January 6
(Agencies): Manipur nung tesüiba ghonda 24 tsüngda Covid-19 agi shiranger nisung 2 süiogo. Tena züingsema tasür ajak agi 363 kümogo.

Tesüiba ghonda 24 tsüngdasa nisung 86 dak COVID-19 aliba putetogo.

JNIMS nung arishi küm 34 tain tebur ka aser RIMS nung

arishi küm 75 tain tetsür ka Covid-19 dak sendakba timtem ajanga asü, ta sorkar osang ka ajanga ashi.

Manipur nung nisung 28,418 dak COVID-19 aliba putetba nungi tang parnok 442 anepaludar.

COVID-19 aliba puteter nisung 27,613 taneptsü nguogo aser ibaji 97.16% taneptsü anguba lir.

GOVERNMENT OF NAGALAND

DIRECTORATE OF LABOUR

New Capital Complex, NAGALAND: :KOHIMA

NO.LBR-984/84 //

Dated Kohima, the 2nd Jan, 2021

CIRCULAR

This is to inform to all the interested candidates that, the training course on cutting & tailoring, knitting and embroidery for the year 2021 is scheduled to commence from April, 2021 at the respective Labour Welfare Centres (LWC); (i) LWC Dimapur (ii) LWC Nagaland Pulp & Paper Co. Ltd Tuli, Mokokchung (iii) LWC Wazeh Mini Cement Plant, Phek and (iv) LWC Doyang Hydro Electric Project (DHEP) Doyang. The application forms for the 8 (eight) months training course will be issued from 1st February, 2021 onwards at the respective Labour Welfare Centres during office hours. Those applicants who have already submitted for the training course for the year 2020 will have to submit a fresh application again. The last date for submission of the application forms will be on or before 26th February, 2021. As seats are limited applicants will be selected on first cum first basis. The Department will provide all the training materials, kits, free of cost to each trainee throughout the training period.

Sd/- (Er. S. L. WATI AIER)
Labour Commissioner
Nagaland, Kohima.



TIR YIMYIM YIMOBILEM (EDITORIAL)

DIMAPUR YANGTEPNÜ, AENJETI (JANUARY) 07, 2021

COVID-19 VACCINE KOMA YANGLUA LIR ?

- P Tiamongba Aier

India'er putiotsü nung vaccine agütsüba inyakyim tulutiba inyaksü atema sentong renema lir aser iba atema Drugs Controller General of India (DCGI)-i vaccine ana amshitsü temelaba agütsüogo. Vaccine anaji Serum Institute of India (SII) ajanga Covishield aser Bharat Biotech ajanga Covaxin lir. India nung ano tanga vaccine tem yangludat saka tang atema DCGI-i vaccine ana ya agütsütsü shimogo aser iba ajanga tarutsü nung tanga COVID-19 vaccine tem tendanger agütsütsü lenmang lapoktsüogo. Deobarnü Central Drugs and Standards Committee (CDSCO)-i Bharat Biotech aser Serum Institute of India (SII) ajanga yangluba vaccines amshitsü mulunga agizükogo aser Covishield o Covaxin ya India nung healthcare workers aser frontline workers nem agütsütsü. Union Health Ministry-i COVID-19 menatsü ana nung lir ta ajitetba healthcare workers aser frontline workers crore 3 shi ka nem mezüng vaccine angati agütsütsü osang metetdaksüogo. Covishield ya AZD1222 indang Indian variant lir aser AstraZeneca o University of Oxford ajanga yanglur. Pune nung amenoka aliba Serum Institute of India (SII)-i AstraZeneca aser Oxford nungi licence meshir Covishield yanglur. Külen, Covaxin ya Hyderabad nung amenoka aliba Bharat Biotech-i National Institute of Virology den yaritepa yanglur. Covaxin ya Drugs Controller General of India (DCGI)-i COVID-19 wara nung vaccine yanglutsü atema telatetba agütsüba ama mesüi yanglur ta scientist karibo iba vaccine amshitsü molunga agizükba atema tebilemtsü abenba shiogo. DCGI-i company anaprong dang nungi tang vaccine tendanga aruba nungi bushitetba osang tejangja meshiogo. Iba atema SII-i Brazil aser United Kingdom nung Phase III trial data ajanga ngutetba osang agütsüogo, saka India nung tendangba osangbo ano magütsü lir. Külen, Bharat Biotech-ibo Phase III trial data metembang sünnung vaccine amshitsü molunga agizükogo. Item osang tejangja ano manguba nung shisabulutsü keta lir. Ano külen, linük balala nung coronavirus tapu tasen ana adokba osang lir, anungji tang yangluteta aliba vaccine yagi item mesen anema raratetsü asü masü ta asüba tasüngdangba adoker. Tanga linüktem nung COVID-19 vaccine agütsütsü tenzükogo aser parnoki tang tashi nung inyaka aruba nung tayongzükba aika ajuruba ajitetogo. Anungji India nunga item kasa tetsükdaksü aser khuretem majurutsü atema renemshitsü kanga nüngdaker. Ano, nisung karibo India nung kanga dang aritepa COVID-19 vaccine agütsütsü atema sentong renemba ya yimtenren tsütsü tajangzük angutsü atema inyakba lir ta ashir. India nung vaccination maparen ano metenzük sünnung Bharatiya Janata Party (BJP)-ibo iba atema tenüngsang agütsütsü tenzükogo. Külen, Prime Minister Narendra Modi-i vaccine agütsüba maparenji linük atema kanga dang nüma atangtsüba mapa ka lir ta shiogo, aser ano pa pusemertemi iba mapa ajanga Modi-i aniba sorkar tenüng ajungkettsü ta ashir. Anungji, COVID-19 anema vaccine junga metendang sünnung sorkari kanga dang aritepa tenüng tajung angutsü atema dang bilema inyaktssüba süra, iba nung tebilemtsü khuret tulu lir. Centre-i taküm July ita tashi nung nisung million 300 shi ka nem COVID-19 indang vaccine agütsütsü alizüng lir, ajisüaka linük nung teintet rogo million aika densema nisung billion 1 nem Covid-19 anema vaccine agütsütsüba tajongzükba tulu ka asütsü. Mapang talangka India nung vaccine balala yanglua arur aser India ya alima nung jenjang dalang agi mozü balala angudak ka ama züngshir, saka tesüba mapangtem nunga India nung shirang balala anema sorkartemi vaccine agütsüba inyakyim nung ashishitep aser temulung melemtep ken o tem adokogo. Anungji tang COVID-19 anema vaccine agütsüba nunga item mesükba ken o tem adoka maparen tom nung anendaka ayutsüsa tensa ka ajuru nungbo ta tsüba bilemtsü. Kokra, Drugs Controller General of India (DCGI) aser Central Drugs and Standards Committee (CDSCO) ajanga India nung COVID-19 anema tang teyangludak vaccine tem ya mapang agia jungjunga tendanger ang nübertem nem agütsü tajungba süla ta bilemer.

OLEMSABANG

YISU NÜTSÜNGTEM POLITICS ASER NAGA NUNGER POLITICS

~ Wati Longchar, Serampore

(Yashi adok nungi...)

NAGA LIMA TEMELNSHI NUNG YIMTSÜNG YIMSÜSÜR ASER NÜBUR TEINYAKTSÜ

Nagaland lima melenshits? asoshi yimtsüng yimsüsür aser nübur dak tashi lir. Kobala yimsüsür shimtsü, kobala party shimtsü nübur dak tashi lir. Ano state sorkar ajanga dang temelenshi bener arutetsü ta mangatetsüla. Yimtsüng yimsüsür aser nüburtemi shilem magi nungbo Naga lima tejakleni aotsü makok.

Tetsü-tobu putu nungi yimsüsüba menden tejangja Naga nungger ajaki lateta bener aru. Naga nungger, talisa Aor, yimtsüng - tulu-tila - kija shia independent state ka amai yimsüsüba telatet takhang liasü. Mongseneri samen menchen kümteta kidong shia nungi yimsüsüba khuretji tambu nungi melentepa bener arur. Junglieri putu menden, küm semer shia lanu putui atsünga melentepa yimsüa aru. Tsüz?ng-ozüng zülü nung yua meliaka, tetsü-tobui jembia aser bentshia aruba dak ajemdaker yimsüsüa arur. Kidong balala nungi tebur tain teshimtet ishikati yimsüsü khuret abenba dak alaka tetsü, ainer, tsüngtsük-longtsüker aser ashi-külaker iba yimsüsüba menden nung shilem magütsü (iba yimden yimsüsüba melenshitsü mapangi tongogo). Khonang aser tashi amshitsü ta tangatetba nung masü, saka nübur tenzüksü, yimtsüng telungtet nung nüburtem küprangküpru madoktsüi yimsü asütsü asoshi ochi meimer aser tasü ita, pei taküm bendanga agütsü nübur tenzüksüba khuret ka amai angateta yimsüsüba menden nung amen.

British nungger yimsüsüba arur külen, Naga nungger ajunga amai yimden sabang kati bener ait. Par yimsüsüba mapang nüburtem tiptema bener aotsü asoshi Gaonbora, Dobashi, SDO, DC, amala yimsüsüba tarensen kübok nübur ajak azüoka ayu. Yamaji yimtsüng aser sorkar tesendaktep nung aotsüsa aküm. Tetsü-tebur ta tebandang mali, tazünger shirnoki tetoktepa tatidang nung takok angur parnoki nübur madak yimsü asütsü tashi agütsü. Nüburtem rongnung küprangküpru madokdaksüi ochi nung yimsü asütsü shim, saka yimsüsür aikati ochimashi inyakba, tejak ajia ozüng bentshia, nübur madak tashi amshiba, khonang-naroküm aser pei ajungtsü asoshi rongsen arishia yimsü asüba ajanga Naga lima teraksa agi sünga lir. Government kisüngi alima renlok daksütsü makok anungji sorkar yimsüsürtemi yimtsüng yimsüsür den teka amteper yaritepa terenlok mapa inyaksü meranger. Saka Govt. nungi koba teyari arur itemji timi mamshiba ajanga yimtsüng aika nung timtem adokba ajangshia arur. Yimsüsüri timi ochi nung lokti ajungtsü atema maparen ajak inyak nungbo temelenshi jenti bener arutet. Taoba putu yimtsüng yimden aser sorkar yimden anaprongla nung tetsü-tobu putu ama tala kümer tenzükba, ochi nung noktakba aser lokti ajungtsü asoshi pei taküm bendanga agütsüba yimsüsüri tanü anünga lir. Tenzüksü ta asüba khuret makaba yimsüsür aika angur.

Nagaland, India nung state ka kümer sülen nungi lokti mulungba yimden yayim ya benoka amshir. Iba yimden yayim ajanga Naga nungger rongnung dang masü, saka India rangben yimden latet nung shilem agitettsüsa leman sadema lapoktsüogo. Tanü alima aika nung, talisa Nagaland nung, nübur teimbai mulungba tatar shimba yayim yagi lokti aser arogo nung teraksa tulutibaji bener arutsüba iba yayim ya ta shitetsü. Yim o yim na, tzükong tsüngda, kidong, kin o kin na, yimlang-yimpang mepu, zünga balala, yimtsüng yimsüsür rongnung aser arogo nung toklang tenzükera dena iba yayim yagi menentsü. Kechiba süra nüburtemi sen tali meimadok. Tata menden nung tokteperi dang masü saka nüburtemi teraksa tulutibaji bener arutsü. Sen agi meyongnem shishitepba, tashiyim amshiba, azü tokshiba, aser tiyazü olulu proka nübur rongnung tsükchi adokdaksüba jenti lir. Ya kenyongi tai aser tashir kati ibala inyakttsüi aksüla aser arendaksüla. Joko iba yimden yayim nungi goonda mapa inyakteter dangashi, ochishir aser linük meimer, nübur meimer, tashir shimtsü kanga tasak kümogo. Lokti nung tashitak tulutibaji election tera ta ashitsü akok. Election nung sen crores aika indoker külenang adoker asü nungji Naga lima nung terenlok mapa inyaksü sen mali, ayatai tia nung lir ta ashitsü akok. Kechiaser takok angur candidate ajaki election sents? omar-ang next election atema rongsen rizüngts? bilemer.

NÜBURTEMI YIMSÜSÜR ATSÜNGDOKBA

Naga lima nung temelenshi adokdaksünera, yimtsüng yimden aser arogo akhangshitsüla. Yimtsüng yimsüsür aser arogo nung tenzükera tashi ita lira, sen crores crore bener aruyonga nokdangtettsü. Lokti temelenshi asoshi, yimsüsüri dang masü, arogo tenzükera dang masü, nübur ajungai temelenshi asoshi sadok sadoka shilem agütsü asoshi sabang yanglutsüla aser ochi nung noktaksü nungitetsüla. Football asayadang, nisung ka kisüngi takok angutsü makokba ama. nübur nungitepba agi leniri takok angur aser temelenshi bener arutsü. Ano Laishiba nung nüburtemiochimashi yimsüsür anema noktakba ajanga yimsüsüba menden laoba angur. Tat. agi, Farao chubai ljiptsü nuso yarir Shifra aser Pua tena dang lbritsürtem nu amungdang tanurji jabaso süra tepsetang ta ashi, saka manga. Chuba masü Tsüngremang tsübuttsü ta tanurji metepset (Anitet 1:15-21). Saul chuba majungba agi, pa chuba menden nung mena aliba mapang nung, ainkar Samuel-i anir Saul dang na Tsüngremi agienogo ta aija atsüngdokba (coup asüba ama) aser David chuba mezüja shimtetba angur (I Sam 16). Nübur rongnung makmakshimak koda adoker alitsü! (Pastor kati anir CM menden atsüngdokba amai). Chubatsü Vashti-i chubai ashiba mangaba aser yimjak nung pa maksüdaksüba angur. Daniel kakat nung asangur ishikati chuba mekülemtsü ta tasü ita noktakba angur. Yisu Khristai ochimashi yimsüsür aitsü aser tajemrepba tia nung alir nüburtem nem nüjiso agütsü.

Tanü putu nunga Baptist Pastor Martin Luther King, Jr. alar ayuba anema noktak. Alar ayuba ya Laishiba tesayuba masü, Tsüngremi meimchir ajak kasa yanglu ta nüburtem ajungmesoa longkak aita ajanga US nung ozüng melenshitsüsa aküm. Mahatma Gandhi anir British yimli aser yimsüsür anema tashi mangai longkak aita (civil disobedience) ajanga British nungger atsüngdok. Phillipines nung President Marcos anema nüburtemi noktak nung pa yimsüsüba menden nung anentsüsa aküm. Tawa tanü Anna Hazariai anir 2011 küm ochimashi mapa anema Jantar Mantar nung longkak aita ajanga Jan Lokpal Bill yangluba aser Congress Government Delhi aser Centre nung laoba nguogo. Nübur nungitba ajanga item lenirtemi alima dangi temelenshi bener arutet. Yimtsüng yimsüsür aser arogo tenzükera lungjemer noktakra, aser nüburtem ochi inyaksü ajungshira aser nungitra temelenshi tulu bener arutetsü.

OTEMBANG

Martin Luther King Jr-i ashi "Sen meimer masü, saka ochi meimer lenir nungdak. Tema nung teyaksang-khonang bushiba masü saka ajemalu lenir nungdak". (We need leaders not in love with money but in love with justice. Not in love with publicity but in love with humility.) Tanü ochishir lenir, tasü tait, tarutsü nüklata tajung akaba aser lokti atema ni taküm bendanga agütsütsü ta shitetba lenir agi anünga lir. Nüburtemi, talisa yimtsüng nung yimsüsür aser arogo tenzükera anir linük meimer, lenisütsü sempet aketer aser ochishir yimsüsür shimtsü ta tasü ita menoktakra asen lima majungtsü; tashiyim amshir, sen akar aser pei ajungtsü dang bilemba lenir dang shimtettsü. Yimtsüng aika nung election mapang yimtsüng nung raratepba, katepba, nisung tepsetba, tashiyim amshitepba aser yim o yim na tsüngda raratep jenti adoktep adoktsü. Ya yimtsüng nung yimsüsür aser arogo nung tenzükera tasü ita ochi nung timi yimsü mesütetba aser mesayuba ajanga ta metetdi. Nüburtem tiptema, liromedema aser azüoka ayutsü asoshi lokti asoshi taküm bendanga agütsüteter, ochishir, Tsüngrem meteter tasü ita shimdi ta ayongzükera.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agütsü mepishir**

CCP-i Tenla ki ka mita aoba sülen pastor den nisung pongu apu



China nung Henan Province kübok Zhengzhou yimti nung ketdangsertemi house church ka bensaja aliba noksa nung angur.

January 06, 2021: China kübok Taiyuan yimti nung China Communist Party nungi ketdangsertemi house church ka mita aoba sülen pastor den züngsem kar apu, ta Christian Post osang ajanga metetdaksü.

International Christian Concern den jembidang Pastor, An Yankui-i, tesüiba ita ka ser tesadang tsüngda tang agi tanabenbuba par kidang amenoka aliba Tenla ki mita aru, ta metetdaksü.

Pastor dak alia Arogo züngsem tetsür pongu apu.

Ketdangsertemisa Tenla kidang tindangba sü aser Khristan kaketter apu. Ketdangsertemi pastor kinüngtsübo mapu, kechiyong lar tanur pongu liasü.

Tetsür pongupronglaji iba aonungjisa chiok saka pastor An Yankui bo anogo 15 tashi tepuokdak ayutsü obendang

agütsü.

Iba Arogo ya Early Rain Covenant Church-i tentetja liasü aser November 15, 2020 núa ketdangsertemi iba Arogo mita arua liasü.

International Christian Concern-i ashiba agi, Chinese Communist Party-i maneni iba Arogo mita arutsü, kechiyong iba Arogo ya Early Rain Covenant Church den sendaktepa lir.

China nung ketdangsertemi Arogotem anema inyakyonga China nung Khristan nütsüng kanga ina tangbo million 60 dak tema kümogo.

China linüki Khristantem anema inyakba dang masü saka Laishiba nung aliba lai tekongtem melenshir.

China nung pastor tem aika atsükadokogo aser pastor temi phone aser computer nung internet

amshiba anenogo, kechiyong parnok indang ID cards nung trackers lir.

China Communist Party-isa Khristmas mapang tekülem sentong nokdangtsü atema Tenla kitem lapoktsü memelaba dang masü saka kentenba aser sempet agütsütepba-a nokdanga liasü.

Communist linüki Khristantem anema inyakba ajanga US State Department aser tanga governing bodies-i China ya country of particular concern (CPC) nung züngokogo.

State Department-i ashiba agi, China linüki tamangba yimsü temedentem anema inyakba ajanga International Religious Freedom Act of 1998 kübok China ya "Country of Particular Concern" (CPC) nung züngokogo.

India nung anti-conversion ozüng tasenba kübok Khristantem apu

January 06, 2021: India kübok Uttar Pradesh nung anti-conversion ozüng tasenba kübok Khristantem apu tenzükogo; tang tesüsa India nung yaküm November ita nung Uttar Pradesh state nunga anti conversion ozüng tasen ka agizüka liasü, ta International Christian Concern (ICC) osang ajanga metetdaksü.

December 19, 2020 núa Prohibition of Unlawful Religious Conversion Ordinance ozüng kübok Greater Noida (Uttar Pradesh) nung Korea nunger Khristan ka den India nunger Khristan asem apu. Gautam Buddh Nagar District kübok Greater Noida nung Khristantemi coronavirus wara mapang nung chiyungtsü aser tanga nüngdak oset balala lemtsüba mapang nung apu.

Osangbener den jembidang teyari agütsüba sentong achaayanger, Raj Kumar Masih-i, "Onoki teyari agütsüba mapang nung tajangzük angurtem indang tenüng aser

phone number onok ket nung lir, aser onoki parnok dang tamangba yimsü meyiptsü atema majungshi, ta parnoki kuli agütsütettsü," ta metetdaksü.

Raj Kumar Masih-isa, "Onoki teyari balala agütsü saka sen bo melemtsü," ta ashi.

Police-i ashiba agi, tetsür kati parnok dang coronavirus wara mapang nung angati teyari agitsü atema la dang Tenla kidangi arung ta ashi; iba sülen nisung pezüi la dang lai Khristan yimsü dangi meyipra la nem sen agütsütsü ta nangzüka liasü.

Tiyazü kuli agütsüba nung ajemdaker police-i Korea nunger Khristan, Mi Kyung Lee den Umesh Kumar aser parnok den yariteper tetsür ana- Seema aser Sandhya nunger apu; Kumar aser Sandya nabo Khristan masü, ta Raj Kumar-i ashi.

Par pezü apuba sülen December 20 nü par pezüprongla court matsüngdangi aoba sülen jail nung puoka liasü. Par pezüi

Uttar Pradesh nung anti-conversion ozüng tasenba alema inyakogo aser tanga tamangba yimsü mezüngmeshiogo, ta police-i par pezü aitsü.

Osangbenertem den jembidang Raj Kumar Masih-i, iba tesem nung aliba Hindu nungertemi mapang shia asalentong yanglur Khristantem nem tai tonglochtsür, ta ashi.

"Pua alirtem dangbo parnok kuli masüngdang. Ano tesüngmangtsü kaji, gari anisang Umesh Kumar aser Sandhya nabo Khristan-a masü, ajisüaka osangbenertemi par pezüprongla Khristan lir ta osang prok," ta paisa ashi.

Tang India linük nung anti-conversion ozüng balala benoka aliba state temji Odisha, Madhya Pradesh, Arunachal Pradesh, Chhattisgarh, Gujarat, Jharkhand, Himachal Pradesh aser Uttrakhand state tem lir.

India nung anti conversion ozüng ya mezüng 1967 küm benoka liasü.

ANOGO ABEN TSÜNGREM DEN

Ain, tetsübu masü
2 Timoti 1:7

Khristan taküm nung tsübutsü ajungshibaji Tsüngrem tsübutsü dang ajungshi (2 Kor. 5:10-11; Ibri 10:31). Nisung tsübubaji Tsüngrem nungi marur. Khristan aikati nisung tsübur, Tsüngrem masü. Parnoki nisung tsübuba agi Tsüngrem peladaktsüba noktanger. Kechiaser tangar peladaktsüba parnoki mapang entoker.

Timoti asangur nisung liasü, Yimya ajanga tasü mait, aser temang nunga tashi mait (1Tim 5:23). Pai Paul rishikangshiba ngur liasü. Pa a yamaji rishikangshitsü ta pai metetta liasü. Pauli Timoti dang tangar tsübubaji Tsüngrem nungi masü ta bilemtetdaksü.

Tetsübui Tsüngremi asenok dang kechi inyaktsü ashi ibaji kecha masüngdanger. Rishikangshi maru tashi asenoki tashi angaba nung temulung lema alitsü akok; tang Tsüngremi shidak asenok jaa ali asü masü arindaker. Tetsübu timba memetetba tetsübu lir. Asenok jakdang kechi lir asenoki memetet. Abedangba agi tsübudaktsür. Asenoki tangatetba tajung tenüngdaktsü. Ibayongji tajung majung angatettsü asoshi Tsüngremi anguba ama asenokia angutsü asenok nem Tanela Temeshi agütsü.

Tsüngrem tashi mangaba tetsübu dak metonglochtsütsüla. Ne dak tashi tait Tanela Temeshi lira tsübutsüba kecha kuli mali. Tetsübui na alar kümdaktsür, saka na nüji kümdaktsütsü Khrista aru. Tetsübu nungi nüji akümtsü aser ne tenük lapoktsütsü Tsüngrem dang asüngdangang. Pai ne tia shidakbaji jungkai adoktsüdang, pain a maneni tashi angadaktsütsü.

Samaritan's Purse-i Covid agi shirangertem atema hospital ka lapoktsü

January 06, 2021: New York City nung aliba Central Park nung COVID-19 field hospital shibangba sülen ita tenet lir Samaritan's Purse-i maneni coronavirus tashidak agi shirangertem anepalutsü atema anüdoklen North Carolina nunga hospital ka lapoktsü.

Sayutsüngir, Franklin Graham-i tenzükba Evangelical humanitarian relief organization- Sammaritan's Purse-i region nung aliba hospital tila pongu yaritsü atema field hospital ka lapoktsü; iba hospital ji Lenoir nung lapoktsü.

Nüngtugu sayutsüngir, asür Rev. Billy Graham'er jabaso aser US Tir, Donald Trump pusemsang, Franklin Graham leniba kübok Samaritan's Purse-i coronavirus wara mapang nung timtembapur jenti yaria arudar.

December ita nung North Carolina nung coronavirus tashidak kanga proka liasü. December 31, 2020 tashi nung North Carolina nung nisung 3,472 tashi coronavirus tashidak agi shiranga hospital-i anir ao, ibayongji hospital nung yipten agi kanga anünga liasü, ta state Department of Health & Human Services-i metetdaksü.

State nung nisung ajak agi 539,545 dak coronavirus tashidak puteta liasü aser iba nungjagi nisung 6,748 süogo.


April ita nung New York ya coronavirus wara prokba tiyongtsü tesem ka liasü, iba mapang nungjia Samaritan's Purse-i yipten 68 aliba COVID-19 unit ka amenoka liasü. Iba dak alia Samaritan's Purse nungi doctor temi nisung 300 dak tema yariba sülen May 5, 2020 nü iba unit shibanga liasü.

Samaritan's Purse-i anüdoklen North Carolina nung lapokba unit nungji tenzüikba wadang kanga junga inyaktettsü imlar, kechiyong parnok indang headquarters ji iba tesem nungjagi mile 30 shi dang pilar lir.

Iba tesem nung aliba Arogotem aikati Samaritan's Purse indang "shoebox ministry" atema tenla kanga agütsüogo; Iba ministry kübok Khristmas mapang nunga alima tesem ajaklen nüngdakba tanurtem nem sempet aika lema agütsüogo.

Samaritan's Purse-i lapokba tent facility amenoktsü atema ghonda 48 dang agitsü aser hopta ka tsüngda nungbosa yangji coronavirus agi shirangertem anepalutsü.

OLONG PAITEP # 5686



TIPIEN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

2. Hai sür inyak
3. Aor tenüing ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

OLONG PAITEP # 5685 TELANGZÜBA


TIPIEN :

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar, 6. Belem,
9. Süjak, 10. Aonung, 11. Dokan,
13. Tinu.

Agüja aliba noksa nung meputepi aliba bushiang



TANÜBO NAI LANGZÜANG

Q. Asia nung takartiba Mukesh Ambani lia Zhong Shanshan-i ajatetogo, süra pa koba linük nungi ?

- a) Singapore
- b) China
- c) Japan
- d) Thailand

===== (Taruba adok nung onoki langzünsü)

YASHI ADOK TELANGZÜBA : Mumbai



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Tepela
Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

JANUARY 2021 TONGTIPANG ANOGOTEM :

- | | |
|------------|--|
| January 9 | Pravasi Bharatiya Divas (NRI Day) |
| January 10 | World Hindi Day, Raising Day of Army Air Defence |
| January 11 | National Road safety week |
| January 12 | National Youth Day |
| January 13 | Lohri |
| January 14 | Armed forces veterans day, Makar Sankranti, Pongal |
| January 15 | Army Day |
| January 18 | National Immunization Day (Polio Day) |
| January 19 | National Disaster Response Force (NDRF) Raising Day |
| January 20 | Guru Govind Singh Jayanti |
| January 24 | International Day of Education, National Girl Child Day |
| January 25 | National Voters Day, National Tourism Day |
| January 26 | International Customs Day (ICD), Republic Day |
| January 27 | International Day of Commemoration in Memory of the Victims of the Holocaust |
| January 30 | Martyrs' Day/Shahid Diwas |
| January 31 | World Leprosy Day |

SUDOKU # 5727

	7		6	8	2			9	5	3	7	1	6	4	9	8	2
2			1					8	8	2	6	5	9	3	7	4	1
5	6			3				2	9	4	1	2	7	8	3	6	5
	8	7							3	7	5	8	1	9	6	2	4
4		1		6			7		6	8	2	3	4	7	1	5	9
6					9	1			4	1	9	6	5	2	8	7	3
7			4	1			2	6	1	9	4	7	2	6	5	3	8
8	1	6							2	6	8	9	3	5	4	1	7
9	2				6		5		7	5	3	4	8	1	2	9	6

TELANGZUBA # 5726

OJANG LUTEP # 5274

- | | | |
|------------|---|----------------------|
| MBTEAR | : | <input type="text"/> |
| YTSONGÜ | : | <input type="text"/> |
| NGNU | : | <input type="text"/> |
| ÜREMTAZK | : | <input type="text"/> |
| AKAMI | : | <input type="text"/> |
| NGTETOKPDA | : | <input type="text"/> |
| NGATAR | : | <input type="text"/> |
| ZÜANGTAJK | : | <input type="text"/> |
| SAGUTANSÜ | : | <input type="text"/> |
| ÜMEAKR | : | <input type="text"/> |

OJANG LUTEP TELANGZÜBA # 5273

ALIMAJI KOMAKA MELENSHIA RENLOKA AOYONGA
PEI SOBALIBA METETA ALITSÜMETETTSÜLA



January 06, 2021 nü Sri Lanka yimtiba, Colombo nung osangbenertem den jembiba sülen Sri Lanka Foreign Minister, Dinesh Gunawardena aser India External Affairs Minister, S. Jaishankar (abelen) na külemi tangokba noksa nung angur.

Hopta ka tsüngda Covid vaccine agütsütsü renema lir: Health ministry

New Delhi, Aenjeti/January 06 (Agencies): Mongolbarnü Union Health Ministry-i, taruba hopta ka tsüngda coronavirus vaccine agütsü tenzüksü atema renema lir, ajisiüka iba maparen tenzüksü atema tang tashi nungbo telemtetba magi, ta metetdaksü.

New Delhi nung osangbenertem senden ka nung jembidang Union Health Secretary, Rajesh Bhushan-i, healthcare workers aser frontline workers-i vaccination drive atema tenüng agütsütsü menügdak, kechiyong parnok tenüngji Co-WIN vaccine delivery management system nung upload süa lir, ta metetdaksü.

Paisa, "Dry-run of vaccination drive nung ajemdaker emergency use authorisation agütsüba anogo nungi tenzüka anogo ter tsüngda coronavirus vaccine agütsütsü atema health ministry ministry renema lir," ta metetdaksü.

Tasüngdangba ka langzüdang Bhushan-i, tang tashi nungbo vaccine agütsüba maparen tenzüksü atema anogo melemtet, ta ashi.

Amongnü Drugs Controller General of India (DCGI)-i Oxford-AstraZeneca indang Covishield vaccine aser Bharat Biotech-i linük nung yangluba Covaxin vaccine na amshitsü atema emergency use

authorisation (EUA) agütsügo.

NITI Aayog züngsem (Health), Dr V K Paul-i, linük nung wara tensa tajungba kümdar, kechiyong teshirangdakpur ajema akümer aser asürtem-a tajemba akümer, ta ashi.

Dr Paul-isa, "Manen tajemba akümtsü asenoki imladi. UK nung putetba tashidak tasenba agi iba linük tongogo aser nisung 71 pila-a yua lir. Tang tashi nungbo iba tashidak bulua meproka atema pelar," ta metetdaksü.

Linük nung vaccine ana amshitsü atema temelaba agütsüba dak sendakba nung Paul-i, scientific lenla densema nüngdak balala ajak abensa inyakba sülen ang temelaba agütsügo, ta metetdaksü.

"Tanü tashi linük ka nung danga (coronavirus) vaccine regular authorisation magütsü. Alimai scientific lenla amshia iba ya beshir aser nüburtem health atema bilema telemtetba agir," ta paisa metetdaksü.

Vaccination chain dak sendakba nung Bhushan-i, vaccines ji refrigerated condition nung belenshitsü aser vaccine belenshibaji digital ajanga track asütsü, ta metetdaksü.

Vaccine yanglurtemi vaccines ji tongti primary vaccine store pezü- Karnal, Mumbai, Kolkata aser Chennai

yimitemi belentsü, aser iba nungjagi ang state vaccine stores 37-i belenshitsü.

Department of Biotechnology Secretary, Renu Swarup-i, vaccines ji 2-8 degrees Celsius nung rizüngtsü aser iba dak sendakba inyakim ajak bentetogo, ta metetdaksü.

Union health secretary Bhushan-i, "Healthcare aser frontline workers-i vaccination drive atema tenüng agütsütsü menügdak, kechiyong parnok tenüngji Co-WIN vaccine delivery management system nung upload sügo," ta metetdaksü.

"Co-WIN-i Unique Health ID yanglutsü atema temelaba agütsütsü. Covid Vaccine dose anaprongla agütsüba sülen QR code certificate ka sorkar indang DigiLocker app nung store asütsü," ta pai ashi.

"CO-WIN Vaccination Management System ya alima atema India nung yangluogo aser iba ya nüburtem taküm anema alitsü atema lir. Iba system nüngdakba linüktem-a India sorkari yaritsü," ta paisa shisem.

India nung coronavirus positive rate shilem 5.87 dang kümogo.

Tesüiba ghonda 24 tsüngda India nung nisung 18,088 dak coronavirus tashidak putet aser kasa mapang nungjisa iba tashidak agi teshirangdakpur 3,490 anepogo.

Tesüiba anogo aika India nung nisung meyrjang metsü tekübok dak coronavirus puteta arudar.

Budget senden jakdang PM Modi-i Economists den senden amentsü

New Delhi, January 06 (Agencies): Joko kobi melii budget senden tenzüksü lia Hokolbarnü Ato kilonser, Narendra Modi-i nüngtugu economists aser iba sector nung mongintem den shisa lemsatep senden ka amentsü.

Niti Aayog-i ayongzüka sendenji video conferencing ajanga amentsü aser senden nungji Niti Aayog Vice Chairman, Rajiv Kumar aser Niti Aayog CEO, Amitabh Kant nata adentsü.

"Taruba budget atema shisa agitsü asoshi Hokolbarnü Ato kilonseri economist tem den senden amentsü," ta sorkar

ketdangser kati metetdaksü. Reserve Bank of India (RBI)-i tang financial year- March 31, 2021 tashi nung India nung rongsenkettsüng shilem 7.5 ajemtsü, ta asadangtetba den külemi International Monetary Fund (IMF) aser World Bank natia India nung rongsenkettsüng shilem 10.3 aser 9.6 ajemtsü ta sangdonger aliba mapang ka nung Ato kilonseri economist tem ajurutsü. 2019-20 küm India nung rongsenkettsüng ainba shilem 4.2 shi liasü.

Taruba Union Budget February 1, 2021 nü benoktsü sentong lir.

Tepela Tasoba Anogo

January 7, 1931- January 7, 2021, tashi nung küm 90 abensaa arishi moatsüba asoshi Tsüngrem nem tenügsang agütsür. Chirnur, mezüng semchir aser tanabuba semchirtem ajaki tepela tasoba salem oboula den lemsateper.

Chirnur aser Semchisemnurtem



Tsüktilemba Tzudir (Kelingmen)

OFFICE OF THE DIMAPUR LONGJEMDANG SENSO TELONGJEM

Ref.No. DLST/GS/99/21

Date: 6.01.2021

TENÜNGSANG AGÜTSÜR

Dimapur Longjemdang Senso Telongjem menden ajanga wb. **T. Imliwapang Kubzar** IAAS, Comptroller and Audit General (CAG) küpok Indian Audit and Accounts department nung Director jenjang tulu anguba osang angashia, pa nem tenügsang tetushi tulu agütsür.

Maneni asen teyanglur Tsüngremi-i lenir taküm aser pa wadang ajak nung temoatsüba liang ta sarasadema yimlaseta atar.

Sd/- (S.Bendang Jamir) President, DLST

Sd/- (Anthony Kubzar) Secretary, DLST

IN THE GAUHATI HIGH COURT (THE HIGH COURT OF ASSAM, NAGALAND, MIZORAM AND ARUNNACHAL PRADESH) KOHIMA BENCH

MAC Appeal No. 1 of 2020
The Oriental Insurance Co. Ltd. ...Appellant

- Versus -
Shri Omenchiba & 3 other ...Respondents

To

1. Shri I. Lanuchiba
R/o. H/No. 66A, Alempang Ward,
Mokokchung, Nagaland.
(Driver of the vehicle B/R No. NL 02/C 1558

NOTICE

Please, take notice that the above appeal has been filed by the appellant (Oriental Insurance Co. Ltd.), wherein you have been impleaded as respondent No. 4.

You are therefore directed to appear before this Court on the 25th day of January 2021 in person or by pleader duly instructed and able to answer all material questions relating to the case.

Take notice that in default of your appearance on the date mentioned above the case will be heard and determined in your absence.

Signed and sealed by order of the Court on this the 27th days of November 2020.

**Deputy Registrar
Gauhati High Court (Kohima Bench)
Kohima, Nagaland.**

Tanü India aser France na senden amentsü

New Delhi, Aenjeti/January 06 (Agencies): Brihostibarnü (January 07) India aser France na senden amentsü aser iba senden nungji linük ana dak sendakba onüktem dang masü saka alima dak sendakba onük balala nung o lemteptsü, ta Bodhbarnü Ministry of External Affairs-i sangdong ka ajanga metetdaksü.

National Security Advisor (NSA), Ajit Doval leniba nung

India nunger team aser Diplomatic Advisor to the France President, Emmanuel Bonne leniba nung France team nati onük aika nung o lemteptsü, ta MEA sangdong nung shia lir.

Bonne-ia India nung tongtibang ketdangsertem-a kar ajurutsü.

India aser France na tesüsabuba senden amenbaji yaküm February ita nung France yimtiba, Paris nung mena liasü, ta kasa sangdong nung shia lir.



New Delhi, January 06, 2020: Bodhbarnü New Delhi nung aliba Hindu Rao hospital nung medical personel kati North Delhi Municipal Corporation Mayor, Jai Prakash dak Dry Run COVID-19 vaccine exercise agiba noksa nung angur.



Coronavirus tashidak pokteter England nung national lockdown asemubaba benoker mezüing anepdang nisung ka anüshi amer London yimti nung jaja aoba noksa nung angur. Hombar aonung British Ato Kilonser Boris Johnson-i nüburtem kilung nung alitsü totuyuba ya agütsü, kechiaser UK nung ketdangsürtemi COVID-19 tashidak agi menepba anepalutsü mokoki akümer.

Central Mali nung tayimtsü amshia amakdang nisung 20 tepset

Bamako, Aenjeti/January 06 (Agencies): Central Mali nung hopta tatemlen tayimtsü amshia amakdang telungpur ter dak tema tepset, ta France-i ashir, saka helicopter ka nungi injang khaloktsüba mapang kiyir benjong ka nung adener nisung 20 tepset, ta yimdaklir aser yangji aliba telok kati ashi.

Bounti nung aliba yimtaklir temi ashiba agi, Deobar anüngdang helicopter ka kisüing nungi injang khaloktsü aser kiyimba benjong ka nung adenshia alirtem aoksatep.

"Pei takum kumzüktsü asoshi jena ao," ta yangji alir Ahmadou Ghana-i ashi.

Yimtaklir Mady Dicko-i ashiba agi, "Ajungbena lendong ya atalok. Helicopter ya ali anasai alua liasü."

Mali nung Fulani ethnic telok indang sobaliba

ajungkettsüba lokti tentet, Tabital Pulakuu ajanga, "kiyimba mapang tayimtsü amshia amakdang civilian 20 shi takum samatsü," ta Deobarnü sangdonga liasü.

France mitkar indang odongtar Colonel Frederic Barbry-ibo tayimtsü amshia amakba aser kiyimba benjong sendaktepa mali ta ashi aser tayimtsü amshia amaksü lia osang agitepba nung yamaji kecha meliasü, ta ashi.

Anogo ishika itdangiter temi mita aoba mapang temolung melemteti nisung telok ka adenshiba sayuba sülen operation ya agi, ta Barbry-i The Associated Press news agency dang ashi.

Nisungtem yimya, hadir aser danga itdangiter osangtem nung ajemdaker parnok ya kiralongrar telok ka ta France

mitkartemi angatet, ta pai ashi.

Mali sorkar nungi tang tashi osang kecha agüja mali.

Mali nung aliba UN indang human rights section nung tekolakba, Guillaume Nguefia-ia iba tatalokba indang ashi saka iba indang osang tejangja kecha magütsü.

Iba yimtsüing ya Mopti region nung lir, koba Mali yimtiba, Bamako nungi kilometer 600 shi pilar lir, kong telungpur telok aika lir.

2012 küm northern Mali nung mitkartemi operation tenzükba sülen iba region ya tiyongtsü akum aser meilongi anasa aliba Burkina Faso aser Niger linüktem tashi oa liasü.

Iba rara nung sepai aser civilian taküm meyirijang aika laluogo aser ano nisung meyirijang aika pei ki yutsür tesem balala nung jenoka lir.

Japan nung state of emergency benoktsü ana nung lir

Tokyo, Aenjeti/January 06 (Agencies): Japan nung anogoshi COVID-19 tashidak puteta aruba rongnung Bodhbarnü timtiba putet, kong sorkari Tokyo greater metropolitan area nung state of emergency benoktsü atema health tsütsü mongintemi ajungshir.

Iba tashidak tali akumba ajanga Tokyo aser anasa aliba tesemtem nung stage pezü aliba alert temaba jenjang nung lir, anungji regional governor temi emergency sangdongtsü asüingdang, koba Ato Kilonser Yoshihide Suga-i Brehostibarnü sangdongtsü imlar.

Bodhbarnü health ministry nung menatepa aoba tashidak

tsütsü mongintem senden ka menogo, koba anogo aika tsüingta tanabuba senden alitsü. Parnoki mera tesashi benoktsü ajungshir, aser Suga-i rongsenketsüing jenjang tamajungba mükumdaktsütsü meranger.

"Tang asenoki mera tesashi agiaka January ita tatem tashinung Tokyo metropolitan area stage 3 dangi bener alutsü tasak asütsü," ta National Institute of Infectious Diseases tekolakba, Takaji Wakita-i senden amenba sülen osangbener dang ashi.

Linük tesem ajungalen iba tashidak agi nisung tasen 6,001 menepa liasü, koba anogoshi putetyonga aruba rongnung timtiba alitsü. Tokyo kisüing nung

cases 1,591 liasü.

Mera tasen magira Tokyo nung February ita tashinung anogoshi nisung tasen 3,500 dak coronavirus putettsü aser March ita 7,000 ajungtsü, ta Kyoto University scientist Hiroshi Nishiura-i asadangteta lir. Iba tashidak menatepa aoba ketdang sütettsüsa akumtsü atema ita ana emergency sangdongtsüla, ta pai ashi.

Sorkar tenteta aliba telok nungi lenirtemi ita ka atema emergency benoktsü aser nungdakra atsülangtsü, ta Mongulbarnü shia lir. Taküm küm tom nung Olympics ayongzüktsü alinung sorkari rongsenketsüing atema khuret abener.



Bosnia anüdoklen Visegrad jila anasa Drina ayong nung tayimtsü nungi tangokba noksa ka nung plastic bottle, süng, hong agi jabanger aliba barrel aser danga jana reja tem angur. Iba Drina ayong temalen Montenegro, Serbia aser Bosnia nung jana ya iba dang nungi kanga agi timba lir. Balkan linüktem nung jana reja junga anepalu masür aser item jana ya ton aika ayong nung ponger aor.

DRC anüdoklen telungpuri civilian 22 tepset

Kinshasa, Aenjeti/January 06 (Agencies): Democratic Republic of the Congo (DRC) nung North Kivu province kübok yimtsüing ka nung telungpuri maka civilian tajemba agi 22 taküm samatsü, ta yangji alir ketdangsür kati ashi.

Beni territory kübok Mwenda yimtsüing nung iba azüdokshi mapa ya Uganda sorkar anepba telok, Allied Democratic Forces (ADF) ajanga inyak, ta Beni territory indang administrator, Donat Kibwana-i osangbener dang ashi.

"ADF telungpuri Mwenda yimtsüing Hombarnü 19:00 ako (par mapang) meta maka civilian 22 nok agi lepetset," ta Kibwana-i ashi.

Yangji aliba lenir Ruwenzori Bozy Sindiwako aser Iteni Muvunga Kimwele nati Mongulbarnü telephone ajanga osangbener dang ashiba agi, telungpur yagi iba mapa tamajung inyakba nung nok amshi aser yimtsüing nung rakzükraktema liasü.

Ketdangsür Fulbert Kasairo-i ashiba agi, auya aliba osettem tesem dangai belentsü atema lendong agütsürtemi yimtaklir ter dak tema pua bener ao.

"Onok aliba region ya auyi dang, leper ka ama. Onok tia tamajung nung alir aser

ketdangsürtemi temolung magütsür," ta Kasairo-i ashi.

Item telungpur aridoktsü atema mitkartem kanga menur ang aru, ta Bozy Sindiwako aser Muvunga Kimwele nati ashi.

"Iba amai tanen makai nisung tepsetba ajanga Beni yimti ama danga tesemtemi nüburtem jena aor," ta Bozy Sindiwako-i ashi.

"Tang yimtsüing ajunga mangyim nung lir, ozü kinungertem tepset aser ni kanga jashir," ta Muvunga Kimwele-i ashi.

Armed Forces of the Democratic Republic of Congo (FARDC) nungi Lieutenant Antony Mwalushayi-ia lendong agütsüba ya ashi saka osang tejangja magütsü.

Kasa region nungsa Loselose aser Loulo nung telungpurtem süyiba sülen nisung tasüming 21 shisaa orr Hombarnü ngutet, ta ketdangsürtemi shia liasü.

ADF ya Uganda northeast tsütsü 1990s nung tentet aser DRC anüdoklen küm aika civilian tem tepseta arur.

Ozüing alema ali rongsen shishilempaba ajanga azüdokshi tenzüker, ta UN ajanga ashir.

Sepai ama telok balala tenteta alirtemi yimtenren tsütsü par takhangba yutsür ali rongsen shibelenba nung shilem agir.

Democrats temi US Senate amokbangtsü akok

Atlanta, Aenjeti/January 06 (Agencies): Bodhbarnü Democrats temi Georgia nung US Senate atema toktepba nung menden ka nguteter ano tanabuba akoktsü anasa lir, aser ibaji ajanga parnoki chamber amokbangtsü aser Tir inyaktsü shimteta alisang Joe Biden sentongtem takok ngua inyaktsü tashi angutsü.

Martin Luther King Jr. indang otsüsütsü Baptist arogo ka nungi sayutsüingir Raphael Warnock-i tang inyaka alisang Republican telok nungi Kelley Loeffler madak takok ngua iba state nungi Black senator mezüingbuba akumer. Documentary film yanglur Jon Ossoff, shiba arishi küm 33 tain lir, pa ya tang teinyakdak David Perdue dang vote tera agi timba nguteta lir, aser pai takok ngutetra Senate züingsemtem rongnung pa tanubusang asütsü, saka tekeratiba agi iba vote osang ya Bodharnü mena tashinung ang angashitsü.

Iba state ya küm aika Republican temi amokbanger lia aru, saka Tir menden yutsütsü alisang Donald Trump inyakim ajanga temelenshi ya arur.

Hombarnü Trump-i Georgia nung Republican anaprong atema nübu yimja liasü. Saka

ita ana tashi pai tir election nung takok manguba melenshitsü merangdang pa busemer tezüdanga akum. Iba mapang pai Georgia nung aliba Republican ketdangsürtema aija liasü aser kuli tejangja magütsüteti November 3 election nung ashikülak mapa inyak, ta jembia arur.

Vote shilem 98 azüingba nung Warnock ya Loeffler dang shilem 1.2 (vote 54,000 shi) agi temaba jenjang nung lir, ta Edison Research ajanga ashi. Perdue dang Ossoff ya vote 16,000 shi agi timba liasü.

Menden anaprong nung Democrats temi takok ngutetra parnoki Senate amokbangtsü, kong telok ana tsüingta menden ya kasa sadangtsü aser Vice President inyaktsü shimteta alila, Kamala Harris-i olepdang agütsütsü. US House of Representatives nunga Democrats tem tera agi timba lir.

Republican temi menden tanabuba ya ngutetra parnoki Biden indang sentongtem aser pai shimtetba nübutem magizüktsü tashi angutsü.

Biden-i takok anguba kuli agütsütsü atema Congress nung Bodhbarnü electoral vote tem azüingtsü, kong Vice President Mike Pence menden sür agitsü.

SATIER KÜM 60 (PUTU ANA) AJUNGBA TEPELA ANOGO MR. L. TOSHI IMSONG & MRS. CHUBASANGLA LKR (UNGER)



Tsüngremi Oja, Oba nem tanü tashi arishia yutsüba den külemi satier küm 60 ajungba anogo Tsüngrem tenüng sanga onoki arishi meshia sarasademtsür.

Chirnurtem, Semchirtem, Anükapang aser Kinüngertem.

India nung Poco M2 aser Poco C3 jenjang ajemogo

Aenjeti/January 6, 2021

(Agencies): India nung Poco M2 aser Poco C3 phone jenjang ajemtsüba iba China nunger company yagi tanü sangdongogo. Tang Poco M2 base 6GB + 64GB variant ya sen 9,999 (taoba mapang sen 10,999) agi alia amshitetsü aser 128GB model ya sen 12,499 agi yoka aliba 1,500 ajemer sen 10,999 agi angutsü. Kasa mapang nung Poco C3 base 3GB + 32GB variant sen 7,499 agi agnutsü aser 4GB + 64GB variant jenjang 8,999 aliba 8,499 kümtsüogo.

Poco M2 aser Poco C3 naprongla Flipkart aser partnered offline retailers tem nung angutsü. Iba den bendenloksema Walmart-i teyari agütsüba e-commerce company yagi exchange offer, no-cost EMI aser 5 percent cashback on Flipkart Axis Bank credit card amala maongkatem agütsüdar. Costumer temi küm

ka atema phone protection, Flipkart Protect nungi jenjang tajemba agi alitsü atema shimtetsü.

Poco M2 nung tongtiban features tem rongnung 6.53-inch display den full-HD+ (2,340x 1,080 pixels) resolution, waterdrop notch design ka, aser Corning Gorilla Glass 3 protection densema lir. Phone nungsa octa-core MediaTek Helio G80 processor, 128GB expandable memory aser 5,000mAh battery ka den 18W fast charging inokja lir.

Camera tsütsü phone tesülen 13-megapixel main sensor ka den 8-megapixel ultra-wide camera ka, 5-megapixel macro shooter ka aser 2-megapixel depth sensor ka keta lir. Selfie aser video calling atema tejaklen 8-megapixel camera ka inokja lir. Tanga features tem rongnung dual-SIM capability, 4G VoLTE, Wi-Fi, Bluetooth 5.0, GPS/ A-

GPS, IR blaster aser USB Type-C port densema lir.

Kasa mapang nung Poco C3 nung 6.53-inch HD+ LCD display den waterdrop notch ka aser 20:9 aspect ratio keta lir. Iba phone nem octa-core MediaTek Helio G35 SoC ka ajanga tashi agütsütsü aser iba den 4GB RAM aser 64GB internal storage keta lir. Poco C3 nung expandable storage ka, koba 512 GB tashi atsülanga amshitetsü, iba atema microSD card slot ka mejeta inokja lir. Maneni iba phone nung 5,000mAh battery ka den 10W fast charging support keta aliba angutsü aser OS-ji Android 10-based MIUI 12 asütsü.

Phone tesülen triple camera setup nung 13-megapixel main shooter, 2-megapixel macro camera ka aser 2-megapixel depth sensor ka keta lir. Poco C3 nung selfie camera ya 5-megapixel shooter ka asütsü.

Sorkari sentoker aliba kin tem atema ST jenjang bushitsütsü: CM PS Golay

Gangtok, Aenjeti/January 6

(Agencies): Sikkim Chief Minister PS Golay-i, par sorkari state nung sentoker aliba kintem atema Scheduled Tribe (ST) jenjang takok tashi bushitsütsü, ta tenangzükba agütsüogo.

Sikkim Chief Minister PS Golay-i ashiba agi, sorkari sentongker aliba kintem züngoksemtsü atema tenangzükba ya parnok indang election manifesto nung agütsüogo.

"Iba mapa ataloktsütsü atema sorkari takokba tashi inyaksü," ta Sikkim Chief Minister PS Golay-i ashi.

PS Golay-isa, Mongolbarnü Samman Bhawan nung ST jenjang mongui aliba kin 11 nungi lenirtem den ajurutepa liasü.

Sentoker aliba kintem ya Chief Minister-i iba ken o nung parnok tebilemba benoktsü asoshi jaok.

Golay-i, kin lenirtem dang Sikkim Lok Sabha MP Indra Hang Subba-i New Delhi nung iba tenangzükba ataloktsütsü asoshi tanen makai inyakdar, ta metetdaksü.

"Onoki teyazü tenangzükba kecha magütsütsü," ta PS Golay-i lenirtem dang ashi.

Kasa mapang nung Sikkim

Chief Minister's Office (CMO) sangdong ka ajanga ashiba agi, tang mezüngbuba lenirtem ajak tesem ka nung ajurutepogo aser Chief Minister-i arok nükjidong ka atema longjemmer inyaksü parnok ajungshi.

Golay-isa, item kintem dang iba ken o maneni tejakleni bener aotsü atema lokti ka tentetsü mepeshi.

"Sorkari state nung aliba nüburtem tejangraba ataloktsütsü atema maneni inyaksü aser kasa mapang nung iba nükjidong ataloktsü atema telongjem aser tangatetep kanga tongtiban lir," ta Golay-i shisem..

Mulongnen O Lemsateper



TASOBA :
19/8/1932

TASÜBA :
28/12/2020

Onoki teti meima aliba tsürabur asür **Taliozung**, Ex GB Changtongya shirangba anogo nungi tasüba anogo tashi yimeryimsanger aser bendangter nungi nübo rongsen aser sarasadem agi yaritepogo nenok ajak dang tsüngdong arua meshitet nung nenok temeim mapa tajung onoki kodanga mamatsü aji ozü tamang sarasadem, nenok ajak dang kangsa pelar.

Tsüngrem takarsangi nenok kija kibong mulamushia moajangma.

Yangi kangasa pelar ta nisung kar tenüng shisemer :

- | | |
|-----------------------------------|-------------------------------|
| 1. Shri Imnatiba Advisor | 8. Dr Wapang |
| 2. Shri Imokaba Comemissioner Dmp | 9. Mr & Mrs Imsuyanger |
| 3. Shri Limasunep IPS Kohima | 10. Multipurpose Society |
| 4. Mr & Mrs Taliangshi | 12. Changtongya Baptist Arogo |
| 5. Mr & Mrs Imtidakba | 12. Kiyonger |
| 6. Mr & Mrs Imrongkumden | 13. Kosangsanger Putu |
| 7. Noktarba chirtem | |

~ Temeim Kinungtsü, Chirnur, Semchir aser Anükapang

MENUNGRA BILEMTETER



Talimerang Ozukum

Nai onok toktsür tanü agi küm ka renteta aruogo, saka ne mapa aser temeim onoki kodanga mamatetter. Nai onok asoshi sarasademtsüba aser sayutsüngi tajung agütsüba tanü tashi onok mulung nung yua mapa küma arudar. Ne aküm tulu aser milentong onok asoshi teti tesangwa alitsü.

Temeim Chirnurtem aser Semchisemnurtem.

State highway ajanga institutes tongtiban tem sendakteptsü: Khandu

Itanagar, Aenjeti/January 6

(Agencies): Arunachal Pradesh Chief Minister Pema Khandu-i, state public works department (PWD) dang state nung mezüngbuba highway; Gohpur Tinali-Sangdupota (25km) lenmang ya taküm financial year nung tinyaktsü rongnung tongtiban maparen ka kümdaktsütsü tuyuogo.

Chief minister-i Mongolbarnü highway yanglutsü atema MLA Tana Hali Tara, chief secretary Naresh Kumar, PWD commissioner Kaling Tayeng, planning commissioner Prashant Lokhande aser PWD chief engineer Atop Lego nunger den Itanagar nung sensaksemogo.

Iba highway ajanga National Institute of Technology, Jarbom Gamlin Law College, film institute, army cantonment, Women's College amala national aser state institutes tem sendakteptsü

"Tanü senden nung PWD dang Arunachal indang mezüngbuba state highway,

Gohpur Tinali-Sangdupota lenmang (25km) takaratiba nung yanglutsü tuyuogo. Iba lenmang ajanga NIT, law college, film institute amala tongtiban institutes tem sendakteptsütsü. Lenmang atema nüburtemi ali angati agütsüba atema pelar," ta Pema Khandu-i tweet asü.

Arunachal Pradesh deputy chief minister Chowna Mein-ia tawa Pradhan Mantri Gram Sadak Yojana (PMGSY) scheme kübok Miao nungi Vijohnagar tashi km 157 talang lenmang ka teyangludak aliba asadangogo.

Mein-i, mapa kanga meyilongi inyakba aser nüngdak makaba nung inyakyim atsüzükba atema kanga temulung masüba lemsatepogo.

Lenmang yangluba contractors aser agencies temi, lisa majungba aser tesem aika nung anentsüh aluba den tsüngsang mopung majungba ajanga ita ishika dang mapa inyaktetba agi inyakyim menor ta ashi.

Thailand Open nung shilem agitsüpur kadak danga Covid meputet: BWF

Aenjeti/January 6, 2021

(Agencies): Team 22 nungi asayar 216 aser parnok nem teyari agitsürtem den stakeholders ajak densema Yonex Thailand Open nung shilem agitsüpur nisung 824 dak Bodhbarnü coronavirus tashidak tendangogo, aser nisung ka dak tanga tashidak meputet.

Green Zone quarantine bubble züngsemtem rongnung asayartem aser parnok indang coaching team, umpire tem, line judge tem, Badminton World Federation nungi ketdangsürtem, Badminton Association of Thailand, medical staff, aser TV production crew tem densema lir aser parnok dak COVID-19 tashidak tendanga liasü.

"International Green Zone nungi shilem agitsüpur ajaki pei linük toktsür Bangkok-i maru

tsüngda tashidak keta mali ta kuli agitsüba sayutsü nüngdaka liasü aser Bangkok tonga aruba sülena quarantine asütsü atema hotel temi mao tsüngda tashidak tendang," ta BWF-i ashi.

"Thailand nungi asayar, staff aser personnel tem daka tashidak tendangogo aser Green Zone bubble nung shilem ka ama quarantine süogo. Tazüokba kübok asayartem training agitsü atema temelaba agitsüogo. YONEX Thailand Open asayaba mapang aser anogo 14 observation period tepeyong quarantine inyakyimtem benoktsü," ta kasa sangdong ajanga metetdaksü.

Tang nisung ajaki Super 1000 asayamung ana; Yonex Thailand Open (January 12-17) aser Toyota Thailand Open (January 19-24) koma asayatetdir ta repranga atatsü. "Asian Leg koba January 31

nü HSBC BWF World Tour Finals asayaa tembangtsü, iba ya metembang tashi COVID-19 tashidak maneni tendanga alitsü aser inyakyimtem ajang ajanga benoktsü," ta BWF-isa ashi.

World number one tarep Marcus Fernaldi Gideon aser Kevin Sanjaya Sukamuljo na BWF World Tour Asian Leg nung masayatsü telemtetba agiogo, kechiyong Sukamuljo dak Covid-19 tashidak potetogo.

Kasa mapang nung kija asayar Nitchaon Jindapol training mapang yiruba ajanga masayatetsü aser Kento Momota daka tashidak potetba sülen Japan nung asayar ajak masayatetsüsa kümogo. Senzusenpongtsü atema tenokdanga tesashi agitsür aliba ajanga China nung asayartemi Bangkok nung shilem magitetsü.



Kolkata nung BCCI tir Sourav Ganguly health dak sendakba nung Mozüki staff temi osang benertem den sensaksemba noksa nung angur. Ganguly shiba temulungjang nung timtem adokba ajanga angioplasty agia liasü, pa temang tajungba kümogo aser Brehostibarnü mozüki toktsür aotsü.

Copa Libertadores Final January 30 nü asayatsü

Aenjeti/January 6, 2021

(Agencies): Rio de Janeiro indang Maracana stadium nung Copa Libertadores final asaya Covid-19 wara pokteter aliba ajanga terpranger medeni asayatsü, ta South American Football Confederation (CONMEBOL) - i sangdongogo.

CONMEBOL representative tem, Brazilian Football Confederation aser local health authorities senden amenba sülen iba telemtetba agia liasü, ta Xinhua news agency sangdong ka ajanga metetdaksü.

"Covid-19 wara South America nung maneni prokshia odor aser iba yongji iba amala asaya tongtibia aser tulu terpranger ajemshir asüyonga

ayongzüka asayatsü tamakoktsü, ta Asuncion nung amendaker aliba teloki sangdong ka ajanga ashi.

Copa Libertadores final koba January 30 nü asayatsü lateta lir, iba asaya ya South American club football nung asaya tongtibia lir.

Argentina indang River Plate aser Brazil indang Palmeiras na semifinal ka nung asayatsü aser Santos o Boca Juniors na tanga semifinal ka nung ajuruteptsü.

Second-tier Copa Sudamericana final asaya January 23 nü Argentine kübok Cordoba yimti indang Mario Alberto Kempes stadium nung asayatsü. Iba asaya ya-a terpranger medeni asayatsü, ta CONMEBOL-i metetdaksü.

India vs Australia: Mayank melena Rohit asayatsü



New Delhi, Aenjeti/January 6

(Agencies): BCCI-i Bodhbarnü Australia den Sydney nung tasembuba Test asaya atema asayartem shimba sangdongogo, koba Brehostibar, January 7 nü nungi tenzüksü.

Imla aliba ama Mayank Agarwal melena Rohit Sharma shimogo aser pa Shubman Gill den külemi opener ama asayatsü imlar. Rohit hamstring yiruba ajanga masayai lir tang team nung densemogo. Pa Australia den ODI aser T20I series aser mezügbuba Test ana (Adelaide aser Melbourne) nung masaya. Tanungba test ana atema pa vice captain asütsü.

Tanabuba Test asaya nung Gill-i kanga junga asayaogo aser pai mezügbuba innings nung out mesüi run 45 yanglu aser tanabuba innings nunga run 35 yanglua liasü. MCG nung asayaba tanabuba Test ya India-i wicket ti agi koka liasü.

Asayar temelenshi rongnung arishi küm 28 tain Navdeev Saini nem Umesh Yadav melena tang Test nung mezügbuba asayatsü atema maongka agitsüogo. Shardul Thakur mesera T Natarajan-i Umesh melentsüla ta jembia aruaka team achaayangertemi ball takaratiba aonba asayar shimtsü asoshi telemtetba agiogo, koba Saini lir.

SCG nung Australia den asayaba mapang captain Ajinkya Rahane-i pacers asem anioka asayatsü. Asayar 11 rongnung Jasprit Bumrah aser Mohammed Siraj na tanungba pacers asütsü. India-i bowler pongu asayadaksütsü imlaa atar.

Australi-i mezügbuba Test wicket ti agi akok, ajisüaka MCG nung asayaba mapang India-i kanga junga asayaa wicket ti agi asaya akok aser kasasa kümogo.

Captain ama asayaba mapang Rahane-i tang tashi

nung khen danga tamakok ngua mali. Arishi küm 32 tain asayar lenisüba kübok India team test asem nung asayaogo aser asembenprongla kokogo. Takok asem ya Australia (2017), Afghanistan (2018) aser Australia (2020) den asayaba mapang angu.

India team asoshi SCG ya takok anguba tesem ka masü. Tang tashi nung India-i iba asayaba moapu nung 12 ben asayaa lir aser khen dang koka lir. Parnoki 1978 küm Bishan Singh Bedi lenisüba kübok asayaba mapang takok angu. India team-i ponguben tamakok angu aser trokben draw asü.

Tasembuba Test atema asayartem:

Ajinkya Rahane (captain), Rohit Sharma (VC), Shubman Gill, Cheteshwar Pujara, Hanuma Vihari, Rishabh Pant, Ravindra Jadeja, R Ashwin, N Saini, Mohammed Siraj, Jasprit Bumrah

Test nung tang mezügbuba New Zealand No.1 kümogo

Dubai, Aenjeti/January 6

(Agencies): Bodhbarnü Christchurch nung tanabuba test asaya nung Pakistan innings ka aser run 176 agi akokba sülen New Zealand team-i tang mezügbuba ICC Test rankings nung mezügbuba jenjang ajangzüktetogo.

Captain Kane Williamson-i double century ka yanglua asayamung ayong ayonga akokba ajanga Kiwis pur temaba jenjangi tuogo aser taoba küm 10 tsüngda Test cricket nung temaba jenjang tongtetba team trokbuba kümogo.

Alima nung number one jenjang tongtetba team tenet lir. Taoba küm ana tsüngda New Zealand-i temaba jenjang tongtettsüsa asaya, saka parnok tanabuba jenjang nung dang tembanga aruogo.

Parnoki point 118 ngutetogo,

koba Australia dang nungi point ana agi timba aser tasembuba jenjang nung aliba India team dang nungi point pezü agi timba asütsü.

England (106) aser South Africa (96) nati top-five abensatsür.

Batting list nunga Williamson temaba jenjang nung lir. Pia taoba innings trok nung double century ana densema century asem yangluba sülen tawa India captain Virat Kohli aser Australia nung nungtugu asayar Steve Smith ajateta temaba jenjang atong.

Maneni New Zealand team ICC World Test Championship nunga temaba jenjang atongtsü ana nung lir.

Parnoki 70 (PCT) percentage points nguteta tasembuba jenjang nung lir, saka Australia (76.7) o India (72.2) na temeneper dang lir.

BILEMDANGANG

"Takok asaa inyakdang dangar takoksadaksü."